

# TE NENEURAA API

NENEIHIA I ROTO I TE PIHA NENEIRAA A TE EKALEZIA A IESU MESIA I TE  
FEIA MO'A I TE MAU MAHANA HOPEA NEI.  
PAPEETE, TAHITI, I TE MAU AVA'E ATOA.

*Te hoo: E 2 farane i te matahiti.*

No. 9

Setepa 1936.

Mat. 30.

*A haamana'o i te mahana Sabati ia haamo'ahia ia. Exo-  
do 20; 8-11.*

*E i teie mahana, te mahana o te Fatu, \* eiaha ta oe ei  
ohipa ê atu, ia ravehia râ ta oe maa mai te aau hoê ia tia ta  
oe haapaeraa; eiaha atu â, ia î to oe oaoaraa. Oia mau hoi  
o te huapaeraa teie e te pure, e a ore ra, e oaoaraa e te pure.  
B. F. 59:12-14.*

## Te Haapaeraa Maa I Roto i te Ekalesia.

**U**A riro te haapaeraa maa e te mau Sabati oro'a ei  
hoê i roto i te Ekalesia nei. Ua iteahia te reira  
e te mau taata atoa tei ite i te mau mea atoa te au i taua  
oroa ra, to'na huru e to'na tumu. Aita teie oroa e haapao-  
hia nei i te tahi vahi ê atu, e a ore ra i roto i te tahi Ekale-  
sia, mai tei haapaohia i roto i te Ekalesia a Iesu Mesia i te  
Feia Mo'a i te mau Mahana Hopea nei; e ua riro te reira  
oroa, i ô tatou nei, ei maereraa no te mau taata êê tei hi'o-  
poa i te reira.



Oia hoi, ua haapaohia te haapaeraa maa, — te ore e amu i te maa ma te opuaraa mau, — i te mau tau tahito roa ei oroa mo'a. Ua ite papu to Iseraela tahito i to'na auraa e ua haapao ratou i te reira i te hoê tau. Area râ, ua riro te reira haapaoraa ei peu noa iho na ratou, e i te tahi mau taime ua riro ia ei faaahaaharaa na ratou mai te au i te mau parau ta Iesu i parau i ta'na mau pîpî:

*E ia huapae outou i te mua, eiaha mai ta te feia haavare e faarumaruma i te mata ra; o tei faahuru ê i to ratou mata ia ite te taata e te huapae ra ratou i te maa... Area ia huapae oe ra, e tahinu i to upoo, e e horoi i to mata; ia ore ta oe haapaeraa maa ia itea e te taata, i to Metua râ, e na to Metua iho tei ore roa i moe te hoê mea ia'na ra, ore noa oia iho i te itea, e faautua faaite mai ia oe. (Mataio 6:16-18.)*

Ua faaitehia te tumu no te haapaeraa maa o te ati Iseraela i tahito ra i roto i te mau parau a te Peropheta ra o Ioela:

*E i teie nei râ, te parau maira Iehova, e fariu mai outou ia'u ma te aau atoa, e ma te haapaeraa maa, e ma te oto, e ma te mihi; to outou aau te hahae, eiaha to outou ahu, a fariu ai i to outou Atua, ia Iehova ra; hamani maitai rahi to'na, e te aroha rahi, e ore e ru i te riri, e te maitai rahi, e tatarahapa oia i te ino i faaitehia mai. (Ioela 2:12-13.)*

E i teie tau tuuraa Evapelia hopea nei, na horoa mai te Fatu i teie faaueraa: *E e horoa atu vau ia outou... te faaueraa ia huaputu outou ia outou iho, e ia haamau ia outou iho, e ia faaineine ia outou iho, e ia haamo'a ia outou iho; oia ia, ia tamâ i to outou mau aau, e ia horoihia to outou mau rima e te arae i mua ia'u, ia tamâ vau ia outou; ia faaite atu vau i to outou Metua, e i to outou Atua, e i ta'u Atua, e aita outou i viivii i te toto no teie nei ui rave hara, ia faatupu vau i tei parauhia mai, i teie nei parau rahi hopea ia outou i te taime e au ia'u. (Buka Fafau 88:74-76.)*



No reira, ia haapao maitaibia te haapaeraa maa, ia amuihia ia te reira i te mana'o tatarahapa, te faahaehaaraa e te aroha i te taata. O te hoê ia ravea, ma te haavî te tino i te varua, — ia faarahi i te mana o te varua; no reira te Fâtu i faaue mai ai ia tatou ia haapao i te haapaeraa maa.

Te faaueraa e vai nei, oia hoi te aufauraa i te moni tusia ra tei amuihia i te haapaeraa maa, o te faito ia o te moni tei ore i haamau'ahia na roto i te haapaeraa maa. E mai te au i to tatou ite no nia i te faatereraa a te Ekalesia, ua riro te Sabati matamua o te ava'e ei mahana haapaeraa maa, oia hoi, te ore e amuraa i te maa i te po'ipo'i e i te avatea e mai te haamata i te haapae i te mahana maa i te ahiahi e tae noatu i te Sabati i te ahiahi. O te faufaa no na tama'araa e piti, tei ore i haamau'ahia, te horoahia i te Amaa no te tautururaa i te mau feia veve. Aifa roa te reira ravea, no te tautururaa i te feia veve, e riro ei hopoia no te mea, e tia i te taata tei navai ia horoa i te moni tusia, e ia horoa oia i te reira, aita oia e pau no te mea te horoara oia tei ore i haamau'ahia e ana no te maa, e i te mau tau maitai, a horoa'i te mau melo i ta ratou tusia, ua navai roa ia no te tautururaa i te mau feia veve. Ua riro teie ravea no te tauturu i te feia veve ei ravea ohie e ia hi'opoa maitaibia oia, ua iteahia e, ua tano maitai roa ia, no reira, o te ravea otahi mau ia.

O te hoê ia ravea te reira no te Ekalesia ia tia i te mau taa-ta atoa, na roto i te haapaeraa maa, ia horoa i ta ratou tusia i te mahana i faataahia. Eiaha ra no te reira i faatiahia'i te hapaeraa maa, no te mea e oroa ia tei haapaohia i te mau tau atoa e aita hoi te tusia i titauhia, no reira, e faufaa rahi a'e to te haapaeraa maa i to te tusia. E haamana'o ra tatou, e mea hau roa a'e i te maitai ia tuatitia te haapaeraa maa i te horoaraa i te tusia ma te hinaaro mau e te onoa.

*Papahia e Iosepha MERRILL Aposetolo.*



## EI RAVEA HOPEA.

**U**A tâpû ihora vau i to'u ririraa e ua opua vau i te tamai i te fenua nei, e taparahi te feia rave hara i te feia rave hara, e tupu mai hoi te mata'u i nia i te mau taata atoa. B. F. 63:33.

Ia haamana'o tatou i te Fatu, ia Iesu, e haamana'o tatou i te hoê taata hau roa, e te mârû, te faaoromai e te here i te taata atoa. Area râ, ua papu ia tatou, na roto i te irava i papaihia i nia nei, tei faaitohia ia Iosepha Semita i Ketelani, Ohio, i te matahiti 1831, e na roto i te tahi atu mau parau papai ( Deut. 32:35; Heb. 10:30. ) e riri Oia e e tamai Oia i te fenua nei, e e faatia Oia ia haamouhia te tahi mau nunaa e te tahi mau feia no'ua ra. Eaha Oia i na reira'i ?

Eiaha tatou e mana'o e, e mea au na te Atua te tamai e te haamaniiraa i te toto. Aita roa ia, e aita te reira mau mea i ravehia maori ra, ei RAVEA HOPEA no te faaoraraa i te taata, no te mea, o te reira te hoê mea i hinaarohia e te Atua oia hoi, *Ia ora te mau taata atoa.*

I aroha mai te Atua i to te ao, e ua tae roa i te horoa mai i ta'na Tamaiti Fanau Tahî, ia ore ia pohe te faaroo ia'na ra, ia roaa râ te ora mure ore. Aore hoi te Atua i tonono mai i ta'na Tamaiti i te ao nei e faahapa mai i to te ao, ia ora râ te ao ia'na. Ioane 3: 16-17.

Ia hope te mau ravea maru i te tamatahia e ana, no te faaoraraa i te taata, e mai te mea eita â ia te mau taata i faaroo Ia'na e i haapao i ta'na mau faaueraa i horoa mai ia ratou ra, e tuuhia paha ia ratou i to ratou mau enemi ia tairihia ratou, peneia'e o te faahaehaa hia ratou e o te tatarahapa ratou. Ia ore râ ratou ia tatarahapa i reira e ia fariu to ratou aau, e riro paha ia Oia i te faatia ia haamou roa hia ratou e ia ravehia to ratou oraraa no nia i te fenua nei. Ua



na reirahia te mau taata i te fenua Kanaana i te taime i ravehia'i taua fenua ra e Iosua e te mau tamarii a Iseraela, na roto i te faaueraa a te Atua; e ua na reira hia hoi i te atī Iareda e te atī Nephi tei parahi i te fenua Amerika. No to ratou ino e te faaroo ore i te mau faaueraa a te Atua, ua ravehia to ratou oraraa no nia i te fenua nei, e ua horoahia taua fenua ra i te tahi mau taata êê.

E maere paha tatou i te Atua i faatia Oia ia taparahi hia taua mau taata ra, area râ, a haamana'o tatou e, o Oia tei horoa i to ratou ora, e e tia Ia'na ia rave i te reira, mai te mea aita ratou i haapao i Ta'na mau faaueraa.

Ia faauehia o Nephi, e te Varua, ia taparahi ia Labana, aita oia i hinaaro ia haamanii i te toto o te taata e ua tau-pupu rii oia i te rave i taua ohipa ra, e ua tae faahou mai te faaueraa ia'na tei na ô mai: A taparahi ia'na, ua tuu mai hoi te Fatu ia'na i to rima na. Inaha, te taparahi nei te Fatu i te feia parau-tia ore, ia faatupu i ta'na ra opuaraa parau-tia. E maitai a'e hoi te pohe o te taata hoê, i te pohe o te hoê nunaa i te faaroo ore. I Nephi 4: 12,13.

Te reira te huru no teie mau taata. Ua faatiahia ia taparahi hia ratou ia faatupu i ta te Fatu mau opuaraa parau-tia e maitai a'e te pohe o teie nei mau taata rii, i te pohe o te mau taata e rave rahi i te faaroo ore na roto ia ratou ra.

Ia vaiihohia te hoê feia parau tia ore i nia i te fenua nei ia rave i ta ratou mau ohipa ino, e viivii ia te fenua ia ratou e e mea maitai a'e ia horoahia te fenua i te tahi mau taata haapao maitai.

A haamana'o atoa tatou e, ia pohe te taata e ere ia i to ratou hopea, e haere râ to ratou mau varua i Paradaiso, e i reira e haapiihia ratou i te Evanelia, e ia farii ratou i te rei-



ra e ia tatarahapa i ta ratou mau hara, e horoahia ia ratou te ravea ia haamatara i tana mau hara ra e ia faaorahia ratou. No reira, te ite nei tatou e, e Atua aroha te Atua e te rave nei Oia i te mau mea tia atoa no te faaoraraa i te taata.

Inaha, teie ta'u ohipa e to'u hanahana, --- ia faatae mai te tahuti ore e te Ora mure ore i te taata. **Buka Poe Tao'a Rahi. Mose 1:39.**

*Papa'hia e Iosepha Orometua.*

## Te Mana no te Haapoheraa I te hoê Mea.

*NA te mau hoa rii no te Heheuraa Api o tei hinaaro i te tamata i te imi i te vairaa o te parau mau no te tau hopea nei; IA ORANA tatou i te farereiraa i nia iho i te tuaro'i o te parau a te Atua nei, o tei faatumuhia i roto i te Mataio i te pene 21, mai te irava 19 e tae noa'tu i te 21.*

I to Iesu ho'iraa mai, mai Betania mai, i taua poi'oi ra ua poia roa Oia, e ia hi'o ra Oia i te hoê suke i te pae aratia, ua haere atura Oia i reira, e ia tae atura râ Oia i pihai-iho, aita roa e maa o nia iho, ua parau atura Oia, "Eiaha roa'tu ei maa e hotu mai i nia ia oe na. Oriorio roa'tura taua suke ra i reira. Ia hi'o ra te mau pipi i te reira, ua tupu te maere rahi i roto i to ratou aau, i te mea i oriorio vave taua suke ra. Ia hi'o râ Iesu i te reira, ua parau atura Oia; Oia mau ta'u e parau atu ia outou nei, e faaroo turori ore to outou, e ere tei ravehia i teie nei suke ana'e ra ta outou e rave, ia parau noa'tu râ outou i teie nei mou'a, Ia pee oe e ia taorahia i raro i te tai, e tia ia."



E au mau here e, e tamata tatou i te hi'o i te huru o te mana'o o to tatou Fatu, a rave ai Oia i taua semeio rahi ra; e ui noa na tatou i teie nei uiraa poto i nia iho, oia hoi e: *Eaha te tumu o Iesu i rave ai i teie semeio?* Pahono poto atoa tatou i nia iho. I roto i te mau mahana a ora'i to tatou Fatu i nia iho i te ao nei ua rave Oia i te mau semeio e rave rahi, mai te faariroraa te pape ei uaina, te faaoraraa i te mau huru mai atoa, e tae noa'tu i te faatiaraa i tei pohe, aita roa râ Oia i haapohe i te hoê mea, no reira ua haapohe Oia i teie nei suke ei faaiteraa e, te vai atoa ra te mana no te *haapoheraa* Ia'na, e e tia Ia'na ia faaora e e tia atoa ia haapohe.

Ia hi'o te mau pipi i te reira, ua maere roa ihora ratou i te mea ua oriorio vave tana suke ra; ia hi'o atura o Iesu i to ratou mana'o, ua na ô atura Oia: 'E faaroo turori ore to outou, e ere tei ravehia i teie suke ana'e ta outou e rave, ia parau noa'tura i teie nei mon'a ia pee oe e ia taorahia i raro i te tai, e tai ia'.

E ui faahou â tatou i te tahi uiraa iti: *Eaha te faaauraa o teie nei suke ta to tatou Fatu i hinaaro?* Pahono faahou â tatou i teie nei uiraa: *Ua faaau Oia i te reira i te haapaoraa ati Iuda, o tei tupu ma te ruperupe e tei faaunaunahia i te mau huru tao'a nehenehe, e ia hi'o te taata i te reira e tupu iho â te mana'o ia haafatata'tu, area râ ia tae te taata i reira, ei reira oia e ite ai e, aita roa e maa i nia i taua tuma ruperupe ra, oia hoi, aitu e mana o roto i taua huru haapaoraa ra!* I te tau no Iesu te parau ra oia i te mau haapaoraa ati Iuda, o tei faaterehia e te mau Pharisea e te mau papai parau; i te tau hopea nei ra, te haapii mai nei taua mau irava râ ia tatou e, e ara ia tatou i taua mau huru haapaoraa ra, o tei faaterehia e te feia o tei rave i te mau pen a te mau Phari-sea ra, o tei faaunaunahia i te mau mea nehenehe o te ao nei, ia hi'ohia e te taata e ia peehia'tu, area râ aita e maa o roto, o te rau ana'e ra, o rapae ana'e tei unauna, o roto ra



ua i ia i te mea faufau. ( Mataio 23:27 ). Te tuu nei ratou i te hopoi'a teimaha e te maraa ore i nia i to vetahi e ra mau tapono, eita ra to ratou rima e faatiaia noa'tu i te reira.

No reira e ara ia outou i te mau Orometua o taua mau huru haapaoraa ra, o tei haere mai, mai te huru mau o te mamoe, area o roto ra, e lukio taehae ia. E ite ra outou ia ratou i to ratou hoturaa; *No nia anei te vine i te tataramoa i te pafairaa mai, e te suke no nia anei i te motuu?*

E faahotu mai te mau raau maitatai atoa i te huero maitai, e te mau raao iino ra e faahotu mai ia i te huero ino. E ore e tia i te raau maitai ia faahotu mai i te huero ino, e ore atoa te raau ino e faahotu mai i te huero maitai. Te mau raau atoa aore i faahotu mai i te huero maitai ra, e tãpũhia ia e e hurihia i roto i te auahi. ( Mataio 7:15-19 ).

*Papahia e Teaopekeiragi à Mariteragi*

## Te Taviri No Te Basileia O Te Atua.

**T**E na ô maira teie nei uiraa ia tatou nei: *Eaha ia te taviri i noaa mai ai te ite no ô mai i te Atua ra?* Teie ia te pahanoraa no uia iho i teie uiraa. 'Na roto ia i te pure e roaa mai ai te ite no ô mai i te Atua ra'. *Eaha ia taua pure ra?* Teie ia te pahonoraa no nia iho i te reira uiraa: 'O te pure mau! O te hiaai mau o te aau! Mai te mea aita tatou i faatano i to tatou feruriraa i to te Atua mana'o, eita ihoa Oia e horoa mai i te ite no tatou, no te mea aita tatou i haapao i te mau ture no ô mai i te Atua ra.



Ua na ô mai ra te Atua: *O tei haapao i tau ture e tae noa-  
tu i te hopea, o te Ora mure te roaa ia ia outou, o tei ore ra i  
haapao i tau ture, o te mauui mure ore te roaa ia outou.* Teie  
te feruriraa no nia iho i taua vahi ra: Na ô maira o Iesu Me-  
sia: *O vau te e'a e te parau mau, e te ora, aore roa e taata e  
tae i te Metua ra, maori râ ei ia'u.*

A feruri maitai i nia iho i ta tatou mau pure. Ua horoa  
mai te Atua Metua i te aveia no tatou e o Iesu Mesia taua  
aveia ra. Aita e nebenehe ia tatou ia ani i te Atua na roto i  
te mau i'oa no te taata nei e te i'oa no te mau melahi: aita'  
toa to te mau peropheta, to te mau Aposetolo e to te mau  
paretenia. Aita te Atua i horoa mai i te reira ei tumu mana'o  
no tatou, no te mea e ere ratou i te Atua mai ia Iesu Mesia.

A feruri maitai to outou mana'o i ta outou mau pure, mai  
te mea te pure nei outou i te mau i'oa no teie mau taata no  
reira ihoa eita ta outou mau pure e tae i mua i te Atua, no  
te ani i te ite no outou, no reira ua vai noa outou i roto i te  
aia mai te matara ore to outou mau mana'o, no reira aita e  
roaa te ite ia outou e i parahi noa'i outou i roto i te aia i  
patuhia ra ia ore ia iteahia, e outou, te amaraa o te mori.  
Te tapeahia nei to outou mau tiamâraa i taua vahi ra e te  
faaite atu nei au ia outou, eiaha e fiu i te imi i taua mori ra,  
e ia iteahia te haapaaraa o te utuafare, a feruri i te pure mai  
ta Iesu i haapii i ta'na mau pîpî a na ô atu ai Oia ia ratou:  
E na ô outou ia pure, *E to matou Metua i te ao ra, ia raa to  
oe i'oa, ia tae to oe hau, ia haapaohia to oe hinaaro.*

A feruri maitai te mana'o i ta outou mau pure, mai te mea  
aita i tano te pure, eita Oia e horoa mai i te maramarama no  
tatou, no te mea e mea ê ta te Atua i faaite mai e e mea ê ta  
tatou e rave nei. Tei ia tatou te ite no taua vahi ra i to ta-  
tou oraraa nei, eiaha e fiu i te imiraa i te taviri no te basi-  
leia o te Atua.



E Imiraa Mana'o No Nia  
I Te SABATI  
Mahana Mitu.

**I** TE faatîtiraahia to Iseraela i Aiphiti, ua aroha te Atua ia ratou. Ua fâ maira oia ia Mose e ua faaue atura ia'na ia haere ia Pharaô ia ani atu ia'na ia tuu mai ia Iseraela ia haere i to ratou iho fenua mau e haamori Ia'na, aita râ o Pharaô i faatia.

Ua iriti etaeta noa maira Oia ia ratou, e ua faataa'tura Oia i te ava'e e te mahana e aratai mai ai Oia ia ratou. Ua faatupu atura Oia i te hoê PASA rahi ei faaiteraa i te mau ui atoa i te mahana i aratai mai ai Oia ia ratou i rapaeau i Aiphiti, oia hoi te 14 no Abiba i te po. Ua riro te reira oroa ei haamana'oraa i te mahana i aratai hia mai ai ratou, e i te 14 no te mau Abiba atoa no te mau matahiti i muri mai, ua haapao to Iseraala i te Pasa ei haamana'oraa i te Abiba i aratai hia mai ai ratou i rapae i Aiphiti ra.

E no te mea hoi e 29 mahana to te tahi ava'e e e 30 mahana to te tahi ava'e, e hoê ava'e apî i tuatihia mai, i nia i te mau ava'e atoa o te matahiti, taa ê roa'tura ia te Abiba i te tahi vahi ê, e te 14 o te mahana i te tahi atu ia mahana ê.

*Te piti o te imiraa mana'o.*

I te mau tau tahito e i teie mau tau atoa, te faatupu nei te tahi mau taata i te oroa amuraa maa i te mahana i fanau ai ratou. Mai te mahana i fanau ai oia e tae roa mai i te mahana ta'na e faatia i te oroa nei, e mahana ê roa ia. Ua faatia ra oia i te oroa i nia i te tai'o o te ava'e e te mahana. E ere ra o te mahana mau ia i fanau ai oia.

Oia atoa te 14 no Tiurai ta tatou e faatura nei.



E haamana'o noaraa teie 14 no te 14 i parari ai te pâ e i roaa'i to tatou tiamâraa e te faahanahana noa hia nei â i teie nei â, area ra te 14 no Tiurai i te matahiti 1789 ua ore e ana ia, e teie mau 14 ta tatou e faahanahana nei, e haamana'oraa ana'e ia no te 14 i te matahiti 1789.

Oia atoa te *Pane e te Uuina* ta Iesu i haamaitai i te Pasa i Ierusalem ra, ua ore ê ana ia; area te mau pane e te uaina ta te mau tino faaroo e haamaitai nei i teie nei, e haamana'oraa ana'e ia i to Iesu poheraa i nia i te satanro.

*Oia atoa te Sabati Mahana Hitu.*

Te mahana hitu ta te Atua i haamaitai e i haamo'a no te otiraa o ta'na mau ohipa ra, e parau fifi roa ia e te taa ore hoi te auraa mau, no te mea ua parau o Petero e, *Hoê â hete i te Patu te mahana hoê e te matahiti hoê tauatini, e te matahiti hoê tauatini, hoê â hete e te mahana hoê nei.*

Ua horoahia mairâ, i nia i te mou'a i Sinaï, te ture, e tei roto i na ture 10 te parau no te *Sabati mahana hitu*, e ia haamo'a hia ia ei haamana'oraa i te mahana i faaoti ai te Atua i te hamaniraa i te mau mea atoa. E i te tau i tuuhia mai ai te ture, ua vai mana noa ia te ture e tae noa mai o Iesu, no reira ua titau atura te atî Iuda ia taparahi ia Iesu no te faahaparaa i taua ture ra; e na Iesu iho i faaite atu e, aita e mana o taua ture ra, te ravehia ra te ohipa i roto i te hiero i te sabati e te rave atoa hia ra te ohipa i nia i te ra'i i te mahana sabati.

Ahiri e mana hope to te ture o te sabati mahana hitu, aore roa ia e taata faahou to te ao taatoa nei, no te mea te faahapa nei to te ao nei i te ture no te mahana hitu, mai tei te mahana i faatoro ai Uta i to'na rima e faatiaia'tu ai i nia i te Afata Faufaa a Iehova, pohe ihora oia.



*Te Sabati o te FAUFAA API.*

I te mahana matamua o te hepetoma ua faairi atura te mau Aposetolo i te reira ei mahana mo'a ei haamana'oraa i to Iesu tia faahouraa.

E i te mau mahana hopea nei ua heheuhia mai te reira parau ia Iosepha Semita te Peropheta, ei mahana mo'a na te Ekalesia.

PAPAIHIA E JOAE A MAIRE,

## TE MAU PARAU API

## E patuhia e 2 Hiero Apî.

Ua faaotihia e te Peretiteniraa Matamua no te Ekalesia e, e patuhia e piti Hiero Apî no te raveraa i te ohipa a te Ekalesia, hoê i te tufaa fenua Idaho e te tahi i te tufaa fenua Tarafonia. Teie te tumu e ravehia'i teie nei ohipa, te vai nei e 200.000 melo no te Ekalesia i Idaho, e e 50.000 i te fenua Tarafonia. E te faaite atoa hia ra e, e riro teie nei ohipa ei tauturu-raa no te mau melo aita ta ratou e ohipa.

## Ua paari mau â.

I te 7 no Tiurai i mairi a'enei ua faatupuhia te hoê oroa no te 80 raa o te matahiti o Augusta Winters GRANT, te vahine a te Peretiteni ra o Hebera GARANATA. Ua faaite oia i reira e, ua oaoa oia i to'na oraraa i roto i te Ekalesia e te tiaturi nei oia e, e maoro â to'na pue mahana i te tavini-raa i te Fatu.

## Aita i maitihia no te inu ava.

No to'na inuraa i te ava, aita te vahine ra o Eleanor Holm JARRETT i maitihia no te pŭpŭ champion, no Amerika, o te haere i te tatauraa rahi i te oire ra i Berlin, Purutia.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.